

hai Tuhanku, sembahyangku ibadatku hidupku dan matiku kerana *Allah Subhānahu wa Ta'ālā*. Saudara-saudara mesti ingat bahawa kita berikrar dan mengaku bahawa hidup dan mati kita kerana *Allah Subhānahu wa Ta'ālā*, dan kita mengetahui bahawa tiap-tiap kita mempunyai tanggungjawab kepada umat dan kepada meninggikan kalimah Allah. Apakah akan kita katakan nanti di hadapan *Rabb al-Jalīl* kalau kita yang telah berikrar sedemikian itu tidak mengendahkan, tidak ambil peduli, tidak mau bekerja untuk menegakkan kalimah Allah?!! Apakah kita akan menjadi satu umat yang hanya tahu mengeluarkan ikrar, mengeluarkan pengakuan kepada Tuhan tetapi kita tidak ambil endah, kita tidak ambil peduli, kita tidak ambil berat untuk mengerjakan usaha-usaha bagi meninggikan kalimah Allah?

Allāhu Akbar Allāhu Akbar Allāhu Akbar!

Kita pada tiap-tiap tahun di dalam *Yawm al-'Id al-mubārak* di dalam hari raya yang bahagia ini, menyeru dari satu ke satu masa supaya dapat diikat satu perikatan yang tulus ikhlas untuk meninggikan, untuk menegakkan kalimah Allah. Dari enam tahun yang silam hingga hari ini dengan berbagai-bagai anjuran kita telah memperingatkan alim ulama khususnya, Ikhwanul Muslimin umumnya, supaya bekerja menegakkan kalimah Allah mengikat persatuan dan bersama-sama memikirkan keadaan-keadaan masyarakat kita yang kucar kacir hari ini.

Allāhu Akbar Allāhu Akbar Allāhu Akbar!

Kita telah menganjurkan kepada seseorang dua ulama yang terkenal di utara Tanah Melayu supaya memulakan langkah-langkah meminta fikiran ulama-ulama di seluruh Tanah Melayu supaya dapat dicari satu jalan apakah cagaran-cagaran dan fikiran-fikiran mereka terhadap kedudukan agama pada masa yang akan datang dan apakah ikhtiar-ikhtiar yang boleh diambil untuk membasmi krisis akhlak yang

semakin hari semakin merebak. Kita berjanji kepada beliau-beliau itu dan kepada sesiapa daripada ulama yang suka memulakan menemui ulama-ulama itu berhubung dengan kita supaya bersama-sama menyelenggarakannya.

Allāhu Akbar Allāhu Akbar Allāhu Akbar!

Ikhwanul Muslimin! Sambil mengucapkan *min al-'āi'dīn al-fāi'zīn al-maqbūlīn* maka kita menyeru kepada Ikhwanul Muslimin sekalianya di mana-mana tempat berada mengumpulkan sebahagian dari sebahagiannya supaya mengambil tanggung jawab supaya memikirkan tanggungjawab mereka terhadap kepada agama Islam masing-masing daerah, dan ingatlah saudara-saudara mempunyai tanggungjawab yang besar untuk meninggikan kalimah Allah di mana saudara berada. *Allāhu Akbar Allāhu Akbar wa lillāhi al-ḥamd.*

* * *

Undang-undang Kehidupan Bahagian Wasiat

Daripada punca-punca yang boleh dipercayai bahawa pihak kerajaan Singapura telah meminta kepada Majlis Islam Penasihat Kerajaan supaya bahagian yang keempat daripada undang-undang perkahwinan yang sedang dihadapkan kepada kerajaan itu dibuang sahaja. (Fasal 47 itu ialah perkara yang menuntut supaya tiap-tiap orang Islam yang berwasiat hendaklah mengikut wasiat Islam dan tidak sah wasiatnya jika dibuat dengan tidak mengikut wasiat Islam.

Sebagaimana diketahui bahawa di negeri jajahan ini banyak orang-orang Islam yang membuat wasiatnya mengikut Undang-Undang British (British Law) yang dengannya boleh memansuhkan hak-hak waris bagi si mati.

Daripada punca-punca ini kita mendengar bahawa dengan tegas Majlis Islam Penasihat Kerajaan tidak mau mundur daripada mengadakan undang-undang yang tersebut. Bantahan-bantahan

atas undang-undang itu, sepanjang yang kita ketahui, adalah dibuat oleh N.A Malal dan beberapa orang Islam lagi lalu disokong oleh orang-orang yang bukan Islam.

Kita berpendapat bahawa undang-undang wasiat itu mustahak adanya kerana menurut segi keislaman seseorang yang mati tidak berhak atas hartanya hanya satu pertiga, sedang dua pertiga yang lainnya ditentukan oleh Allah untuk waris-warisnya mengikut ketentuan-ketentuan yang nyata. Demikian juga kita mengetahui bahawa sepanjang-panjang masa yang lampau jika seseorang Islam mati tidak meninggalkan wasiat maka hartanya akan dibahagi mengikut pembahagian yang ditentukan oleh Islam (*syarak*).

Dengan tidak mengikut syarak, maka pembahagian harta seseorang Islam itu bukannya sahaja, mengikut pandangan kita, terhukum orang itu melanggar hukum syarak, tetapi juga ia telah merampas hak-hak orang yang ditentukan oleh Tuhan untuk mendapatnya. Dengan asas pendapat ini kita berasa hairan bagaimana seseorang peguam yang disebut peguam Islam dan orang-orang Islam tidak reda kepada hukum-hukum Tuhan dan menyokong kepada bantahan supaya hukum ketentuan Tuhan itu tidak digunakan di antara orang-orang Islam?

Kita suka memperingatkan kerajaan bahawa kita umat Islam mau hukum Islam berjalan di sekitar umat Islam. Kerajaan mesti ingat bahawa hukum itu diliputi dan diredai oleh umum Islam, dikecualikan seorang berdua, nampaknya sebagai peguam itu yang tidak gemar hukum-hukum Islam berjalan atau dijalankan. Kita mengharap sekiranya kerajaan tidak meluluskan atau menarik undang-undang itu maka Majlis Islam Penasihat Kerajaan dan pertubuhan-pertubuhan Islam mengadakan bantahan hebat kepada percubaan yang menghalang kepada kehendak supaya orang-orang Islam dihukumkan menurut Islam di dalam warisannya. Majlis Islam Penasihat Kerajaan dan pertubuhan-pertubuhan Islam

wajib mencabar kerajaan dalam perkara ini.

* * *

Masalah Jus Soli

Masalah meletakkan seseorang yang diberanakkan menjadi rakyat Persekutuan yang berjalan dari satu ke satu masa di Persekutuan Tanah Melayu ini telah timbul lagi.

Kepada orang Melayu yang mengikut jejak politik telah melihat bahawa berbagai langkah dan cara mereka telah lakukan untuk mencuba supaya maksud mereka tercapai bagi mendapat hak-hak yang sama dengan penduduk-penduduk negeri ini. Sebelum hidup Perikatan di antara UMNO, M.C.A. M.I.C., apabila perkara jus soli berbangkit, kalau kita tidak khilaf, Sir Cheng Lock Tan telah pun mengesyorkan supaya diadakan suruhanjaya untuk menentukan kedudukan mereka di negeri ini. Orang-orang Melayu membantah tetapi setelah Perikatan hidup dan langkah-langkah menguasai politik yang dimenangi mereka bersama, dengan disedari atau tidak, M.C.A. telah berjaya di dalam siasahnya kerana suruhanjaya yang dihajut mereka telah disetujui dan akan sampai disini pada bulan Mei hadapan.

Apabila orang-orang suruhanjaya itu tiba atau dijelaskan maka orang-orang Cina yang dahulu daripada M.C.A. telah membesar-besarkan perkara ini dan meributkannya kemudian lalu M.C.A. cuba menyalurkan segala fikiran itu menerusi M.C.A. mengisytiharkan bahawa M.C.A. akan mengadakan memorandum tersendiri yang mereka tidak lagi terikat di dalam memorandum bersama dengan Perikatan. Di sebalik itu, rancangan-rancangan perjumpaan besar menuntut supaya kerakyatan itu diiktiraf diadakan.

Di sebalik itu, Sultan-Sultan, Parti Negara dan juga cawangan-cawangan UMNO telah menyatakan bahawa mereka akan membantah